



宋繫太平御覽



403
39



13
403
39



太平御覽卷第二百三十五

職官部三十二

太史令

太史令

殿中監附

大長秋



新念圖書

此係明八年八月八日
所購君山田同八
以讓田一人
贈資一

新念圖書

春秋元命苞云屈中挾一而起者為史史之為言紀也天
度文法以此起也

尚書酒誥曰太史友內史友

太史內史掌國典
法所賓友者也

周書曰維正月王在成周昧爽召三公右史戎夫曰今夕
朕寤遂事其警余乃取遂事之要戒俾戎夫主之朔望以
聞也

禮記曲禮下曰天子建六太曰太宰太宗太史太祝太工
太卜典司六典

又玉藻曰動則左史書之言則右史書之

春秋宣上曰趙穿攻靈公於桃園宣子未出山而復太史書曰趙盾弑其君以示於朝宣子曰不然對曰子為正卿亡不越境返不討賊非子而誰宣子曰嗚呼我之懷矣自貽伊戚其我之謂矣孔子曰董狐古之良史也書法不隱又襄四曰太史書崔杼弑其君崔子殺之其弟嗣書而死者二人續其弟又書乃舍之南史氏聞太史盡死執簡以往聞既書矣乃還

又曰魯昭公二年晉韓宣子聘魯觀書於太史氏見易象與魯春秋曰周禮盡在魯矣

周禮春官下曰太史掌建國之六典太史日官也春秋傳有日官諸侯御

大戴禮曰太子既冠成人免於保傅則有司過之史春秋文耀鉤曰楚立唐氏以為蒼雲如蜺圍軼七蟠中有史官

荷斧之嚮軛而蹲蟠猶周也楚驚唐史曰君慢命又簡宗

廟命天也軛於天文楚之分也於是晝遺炎煙耀于蒼

雲精消無文軛火精雲水氣圍軛水也晝日陽也炎火亦

滅也文則蜺也唐史之冊上滅蒼雲告神以史功也

韓詩外傳曰據法守職而不敢為非者太史也

毛詩序曰國史明乎得失之迹傷人倫之廢哀刑政之苛

吟詠情性以諷其上達於事變而懷其舊俗者也

春秋後語曰晉太史屠黍見晉之亂以其國法歸周

國語曰鄭桓公為司徒問於史伯曰王室多故史伯周余

懼及之焉

漢書曰司馬喜生談談為太史公如淳曰漢儀注太史公

下計書先上太史公副上丞相序事如古春秋遷死宣帝

以其官為令行太史文書而已臣瓚案百官表無太史公

茂陵中書司馬遷仕為郎中奉使西征巴蜀以南略邛笮

音昆明還報命是歲天子始建漢家之封而太史公留滯
周南如淳曰周南洛陽也不得與從事發憤且卒而子遷適反見父
於河洛之間太史公執遷手而泣曰予先周室之太史也
自上世嘗顯功名虞夏典天官事後世中衰絕於予乎汝
復爲太史則續吾祖矣今天子接千歲之緒封泰山而予
不得行是命也夫是命也夫予死汝必爲太史爲太史無
忘吾所欲論著矣遷俯首流涕曰小子不敏請述論先人
所次舊聞不敢闕卒三歲而遷爲太史令
又藝文志曰古之王者世有史官君舉必書所以慎言行
昭法式也

又曰青史子注古史官記事也

又曰孔甲盤孟篇黃帝史官

又曰史籀周宣王太史作大篆

又曰秦太史令胡毋敬作博學章
東觀漢記曰陰猛以博通古今爲太史令
司馬彪續漢書曰張衡字平子以郎中遷太史令妙善璣
衡之正紀渾天儀復造候風地動儀以精銅鑄成員徑八
尺合蓋隆起形如酒杯如有地動樽則震尋其方面知震
所在驗之以事合契若神
張璠漢記曰初王師敗於曹陽欲浮河東下侍御史太史
令王立曰去春太白犯鎮星於牛斗過天津熒惑又逆行
守河北不可犯也由是遂北渡河將自軹關東出立又謂
宗正劉艾曰前太白守天關與熒惑會金火交會革命之
象也漢祚終矣晉魏必有興者後立數言於帝曰天命有
去就五行不常盛代火者土也承漢者魏也能安天下者
曹姓唯委任曹氏而已曹公聞之使人語立曰知公忠於

朝廷天道深遠幸勿多言

應劭曰太史令秩六百石掌天時星曆凡歲奏新年曆凡國祭祀喪娶之事奏良日國有瑞應災異記之

又曰太史令秩六百石望郎三十人掌故三十人昔在顯項南正重司天火正黎司地唐虞之際分命羲和曆象日月星辰勅授民時至于夏后殷周世敘其官皆精研術數窮神知化當春秋時魯有梓慎晉有卜偃宋有子韋鄭有裨竈觀乎天文以察時變其言屢中有備無害漢興甘石唐都司馬遷父子抑亦次焉未塗偷進苟忝茲階既闡候望競飭邪僞以凶爲吉莫之懲糺

漢舊儀曰承周史官至武帝置太史公司馬遷父談世爲太史遷年十三使乘傳行天下求古諸侯之史記魏志曰黃龍見譙橋栢玄問太史令單颺颺曰其國當有

王者

吳志曰吳範字文則會稽上虞人也劉備盛兵西陵範曰後當和親終皆如言其占驗明審如此權以範爲騎都尉領太史令數從訪問欲知其訣範祕惜其術不以至要語權權由是恨也

又曰韋曜字弘嗣孫亮卽位諸葛恪輔政表曜爲太史令撰吳書

沈約宋書曰太史掌曆數靈臺丞專候日月星氣焉

世本日沮誦蒼頡作書

宋衷注曰沮誦蒼頡黃帝之史

唐書曰乾元元年改太史局爲司天臺掌天文曆數風雲氣色有異則密封以聞其小吏有司曆保章正靈臺郎挈壺正等官各有差

呂氏春秋曰夏太史令終古見夏桀惑亂載其圖法而泣

乃出奔商太史高勢見紂之迷亂載其圖法出之周晉太史屠乘見晉之亂以其圖法歸周

帝王世紀曰黃帝使蒼頡取象鳥跡始作文字之篆史官之作蓋自此始記其言行冊而藏之

文士傳曰張衡性精微有巧藝特留意於天文陰陽筭數由是遷太史令

環濟要略曰太史令取善紀述者使記時事天子圖書計最典籍皆副焉

賈誼書曰不知日月之時節不知先王之諱與國之忌不知風雨雷電之眚凡此屬太史之任也

楊雄太史令箴曰昔在太古爰初肇記天地之紀重黎是司降及唐虞乃命羲和欽若昊天百政攸宜夏帝不愼羲和不令洎時亂曰帝旅爰征庶寮至躬唯天爲難夏氏曠

德而明神不獨

荀悅申鑒曰古者天子諸侯有事必告廟左右二史君舉必記臧否成敗無不存焉得失一朝榮辱千載善人勸焉悖人懼焉故先王重之以副賞罰以輔法教宜於今者官以其方各書其事歲盡則集之於尚書

殿中監

六典曰殿中監掌服御之事摠尚食尚藥尚衣尚乘尚舍尚輦六局之官屬備其禮物而供其職事少監爲之貳尚食奉御掌常謹其儲供辨其名數直長爲之貳尚藥奉御掌合和藥物辨藥上中下之三品直長爲之貳尚衣奉御掌衣服詳其制度辨其名數尚乘奉御掌內外閑廐之馬辨其麤良而率其習駁直長爲之貳

尚舍奉御掌殿庭張設湯沐而潔其灑掃直長為之貳
尚輦奉御掌輿輦繖扇之分分其次敘而辯其名數直長
為之貳

大長秋

通典曰天官書有宦者四星在帝座之西周官有宮正官
伯皆主王官官人掌王之內宰理王內之政令以陰禮闈
人掌守寺人及女官戰國時有宦者令秦少府屬官有
中書謁者又有將作衛尉少府各一人並皇后漢景帝中
六年改將作為大長秋顏師古曰秋收成之時長者或用
中人或用士人中人闈成帝加置太僕一人掌太后輿馬
通謂之皇太后卿皆隨太后宮為官號無太后則闕至後
漢復增置丞中宮謁者令中宮尚書中宮私府中宮永巷
令中宮黃門冗從僕射虎賁官騎中宮官署令藥長並隸

大長秋歷魏晉宋梁陳後魏皆有長秋之號而官屬省置
不同北齊有長秋寺置卿中尹各一人掌諸宮閣掖庭等
並用宦者隋改曰內侍省煬帝改為長秋監置令一人丞
二人並用士人唐武德初復為內侍省皆用宦者
後漢書曰鄭眾字季產南陽犍人也為人謹敏有心幾永
平中初給事太子家肅宗即位拜小黃門遷中常侍和帝
初竇太后秉政后兄大將軍憲等並竊威權朝臣上下莫
不附之而眾獨一心王室不事豪黨帝親信焉及憲兄弟
圖作不軌眾遂首謀誅之以功遷大長秋
又曰良賀位為大長秋清儉退厚陽嘉中詔九卿舉武猛
賀獨無所薦帝引問其故對曰臣生自草茅長於宮掖既
無知人之明又未嘗交加士類昔衛鞅因景監以見有識
知其不終今得臣舉者匪榮伊辱固辭之

又曰曹騰字季興順帝在東宮鄧太后以騰年少謹厚使侍皇太子書特見親愛及即位騰為小黃門遷中常侍相帝得立騰與長樂太僕州輔等七人以定冊功皆封亭侯騰遷大長秋用事省闈三十餘年奉事四帝未嘗有過其所進達皆海內名人

又曰曹節字漢豐南陽新野人也靈帝即位以定冊功封長安鄉侯時竇太后臨朝后父大將軍武與太傅陳蕃謀誅中官節等與長樂五官史朱瑀等矯詔誅武蕃等節遷長樂衛尉後轉大長秋

太平御覽卷第二百三十五

太平御覽卷第二百三十六

職官部三十四

國子祭酒

少府監

司業 博士 將作監

國子祭酒

六典曰國子祭酒司業之職掌邦國儒學訓導政令有六焉一曰國子二曰大學三曰四門四曰律學五曰書學六曰算學

韋昭辨釋名曰祭酒者謂祭六神以酒醴之也辨云凡會同饗讌必尊長先用先用必以酒祭先故曰祭酒漢時吳王年長以為劉氏祭酒是也

徐廣釋祭酒云古主人具饌則賓中長者一人舉酒祭地是則長者為祭酒也

漢書曰吳王賜號爲劉氏祭酒應劭曰禮飲酒必祭示有先也故稱祭酒飲時唯尊長者以酒沃爵也又曰張安世薦蘇武明習故事奉使不辱君命宣帝以武壯節老臣令朝朔望號稱祭酒甚優寵之續漢書百官表曰建武初置五經博士太常差次有聰明威重者一人爲祭酒摠領綱紀

漢書百官表注博士祭酒一人掌國子學每朝服進賢兩梁冠佩水蒼玉

蜀志曰先主旣定益州廣漢太守夏纂請秦宓爲師友祭酒

晉書曰表瓌字山甫爲國子祭酒時屬經喪亂禮教陵遲瓌上疏求立學徒帝從之國學之興自瓌始也

又曰裴頠爲祭酒奏立大學講堂築門闕刻石寫五經

晉中興書曰杜夷字行齊以儒學稱中宗以夷爲丞相祭酒中興初皇太子凡三至夷舍執經問義

沈約宋書曰博士秦官也掌通古今員多至數十人有僕射光武增爲十五人蓋一經有數家之學故也皆教弟

子光武改僕射曰祭酒祭酒者一位之元長也齊書曰張緒竟陵王子良領國子祭酒武帝勅王晏曰吾

欲令司徒辭祭酒以授張緒物議以爲云何子良竟不拜以緒領國子祭酒

齊職儀曰晉令博士祭酒掌國子學而國子生師事祭酒執經葛巾單衣終身致勤

梁書令曰王丞字安期爲國子祭酒丞祖儉父暕並居此職三代爲國師前代未有當時以爲榮

崔鴻十六國春秋前秦錄曰建元七年高平蘇通長樂劉

祥並以碩學耆儒尤精二禮堅以通為禮記祭酒居于東岸祥為儀禮祭酒處于西岸堅每月朔旦率百僚親臨講論

後魏書曰韓子熙累遷國子祭酒子熙儉素安貧常好退靜遷鄴之始百司並給兵力時以祭酒閑豫止給二人或有令其陳謁者子熙曰朝廷不與祭酒兵何關韓子熙事論者稱之

後周書曰盧誕本名恭祖拜給事黃門侍郎魏帝詔曰經師易求人師難得朕諸兒稍長欲命卿為師於是親幸晉王第勅晉王以下皆拜之於帝前因賜名曰誕又以誕儒宗學府為當世所推乃拜國子祭酒

隋書曰楊汪字元度拜國子祭酒帝令百寮就學與汪講論天下通儒碩學多萃焉論難鋒起皆不能屈帝令御史

書其問答奏之省而大悅賜良馬一匹

又曰元善遷國子祭酒上嘗親臨釋奠命善講孝經於是敷陳義理兼之以諷諫上大悅曰聞江陽之說更起朕心賚絹百匹衣一襲

唐書曰許後胤嘗侍太宗講後為睦州刺史因入朝乞骸骨太宗召問曰朕與卿刺史資以自養何謂即求致仕後胤對曰年老筋力不逮望得私第時見闕庭太宗曰卿氣力猶強欲何官也後胤陳謝不敢太宗曰朕昔從卿讀書卿今日從朕求官但言所欲不相違也時國子祭酒缺後胤奏言之因授國子祭酒

風俗通曰孫卿有秀才善為詩禮易春秋至齊襄王時而孫卿最老師二為祭酒

齊王融為王儉讓國子祭酒表曰竊以成均義重振古所

崇資師道尊有來攸尚匪由蘭芷疇變入室之情不自朱藍何遷素絲之質

司業

唐書曰韋叔夏遷成均司業久視年特下制曰吉凶禮儀國家所重司禮博士未甚詳明成均司業韋叔夏太子率更令祝欽明等博涉禮經多所該練委以參掌冀弘典式自今司禮所脩儀注並委叔夏等刊定訖然後進奏又曰歸崇勣上言司業者義在禮記云樂正司業正長也言樂官之長司主此業爾雅云大板謂之業按詩周頌設業設虞崇牙樹羽則業是懸鍾磬之簣虞也今大學既不教樂於義則無所取請改司業一爲左師一爲右師位正四品上

博士

六典曰博士掌教文武官三品已上及國公子孫

應劭漢官儀曰博士秦官也博者通博古今士者辯於然否孝武帝建元五年初置五經博士秩六百石太常差次有聰明威重者一人爲祭酒摠領綱紀

漢舊儀曰武帝初置博士取學通行脩博識多藝曉古文爾雅能屬文章者爲之朝賀位次中都官吏稱先生不得言君其弟子稱門人也

漢書曰賈誼文帝召爲博士時年二十許最爲少每詔令議下諸老生未能言誼盡爲之對人人各如其意所出又曰韋賢字長孺爲人質朴少欲篤志於學兼通禮尚書以時教授時人號稱鄒魯大儒徵爲博士

又曰公孫弘對策時百餘人太常奏第居下天子擢之對爲第一召入見容兒甚嚴拜爲博士待詔金馬門也

又曰元鼎中徐偃爲博士使行風俗偃矯制使膠東魯國
鼓鑄鹽鐵還奏事張湯劾偃矯制法死偃以爲春秋之義
大夫出疆有可以安社稷利萬人專之可也湯不能誅
東觀漢記曰甄宇拜博士每騰詔賜博士羊人一頭羊有
大小肥瘦時議欲殺羊分肉又欲投鈞宇因取瘦者自是
不復爭後召會詔問瘦羊博士所在京師因以爲號
又曰歐陽歙其先和伯從伏生受尚書至于歙七世皆爲
博士敦於經學恭儉好禮

後漢書曰光武每朝會輒令栢榮於公卿前說經書帝稱
善曰得生幾晚會博士缺帝欲用榮榮叩頭讓曰臣經術
淺薄不如同門生郎中彭閔揚州從事臯弘帝曰俞往汝
諧因拜榮爲博士

又曰董鈞永平初爲博士時草創五郊祭祀及宗廟禮樂

威儀章服輒令鈞參議多見從用當世稱通儒

華嶠後漢書曰初欲立左氏傳博士范叔以爲左氏淺末
不宜立陳元聞之乃詣闕上疏爭之更相辯對凡十餘上
帝卒立左氏學也

漢舊儀曰孝文皇帝時博士七十餘人朝服立端章甫冠
魏志曰樂祗字文載少好學黃初中徵拜博士于時太學
初立博士十餘人學多偏僻不敢親教備員而已唯文載
五葉並授

又曰文帝黃初五年太學制五經課試之法置春秋穀梁
博士

又曰明帝太和二年詔曰尊儒貴學王教之本也自頃儒
官或非其人將何以宣明聖道其高選博士才任中常侍
者

吳志詔曰古者建國教學爲先所以道世治性爲時養器也自建興已來時事多故吏民頗以目前趨務去本就末不循古道夫所尚不淳則傷化敗俗其案古置學官立五經博士核取應選加其寵祿科見吏之中及將吏子弟有志好者各令就業一歲課試差其品第加以位賞使見之者樂其榮聞之者羨其譽以敦王化以隆風俗

晉令曰博士皆取履行清淳通明典義若散騎中書侍郎太子中庶子以上乃得召試諸主有法度者及白衣試在高第拜郎中

晉書載記曰姚泓受經於博士淳于岐岐病親詣省病拜于牀下自是公侯見師傅皆拜焉

後魏書曰崔逸字景雋好古博涉爲國子博士每因公事逸常被詔獨進博士特命自逸始也

後周書曰盧辯字景宣爲太學博士以大戴禮未有解詁辯乃注之其兄景裕爲當時碩儒謂辯曰昔侍中注小戴今爾注大戴庶纂前脩矣

隋書曰馬光開皇初高祖徵山東義學之士光與張仲讓孔籠竇士榮張黑奴劉祖仁等俱至並授太學博士時人號爲六儒

又曰馬光爲太學博士嘗因釋奠高祖親幸國子學王公以下畢集光升座講禮啓發章門已而諸儒生以次論難者十餘人皆當時碩學光剖析疑滯雖辭非俊辯而理義弘贍論者莫測其淺深咸共推服上嘉而勞焉

又曰王頗授著作佐郎尋令於國子講授會高祖親臨釋奠國子祭酒元善講孝經頗相與論難詞義鋒起善往往見屈高祖大奇之超授國子博士

又曰何妥授大學博士帝初欲立五后以問儒者辛彥之對曰后與天子匹體齊尊不宜有五妥駁曰帝嘗四妃舜又二妃亦何常數由是封襄城縣伯

又曰房暉遠爲國子博士會上令國子生通一經者並悉薦舉將擢用之既策問訖博士不能特定臧否祭酒元善恠問之暉遠曰江南河北義例不同博士不能遍涉學生皆持其所短稱己所長博士各各自疑所以久而不決也祭酒因令暉遠考定之暉遠覽筆便下初無疑滯或有不服者暉遠問其所傳義疏輒爲始末誦之然後出其所短自是無敢飾非者所試四五百人數日便決諸儒莫不推其通博○魯國先賢傳曰漢文帝時聞申公爲詩最精以爲博士申公爲詩傳號曰魯詩

李邵別傳曰邵上書太后數陳忠言其辭雖不能盡施用

輒有策詔褒贊焉博士著兩梁冠朝會宜隨士大夫例時賤經學博士乃在市長下公奏以爲非所以敬儒德明國體也上善公言正月大朝引博士公府長史前○殷氏世傳曰殷亮建武中徵拜博士遷講學大夫諸儒講論勝者賜席亮重席至八九帝嘉之曰講學不當如是耶

典略曰公儀休者魯博士也爲魯相無所變更百官自正使食祿者不得與下民爭利

論衡曰王莽之時省五經章句博士弟子郭略夜定舊說死於燭下

少府監

六典曰少府監之職掌百工伎巧之政令摠中書尚左尚右尚職治掌治五署之官屬正其工徒謹其繕作少監爲之貳

漢宮宰尹下曰少府言別爲小藏故曰少府

漢書曰少府秦官掌山海地澤之稅以給供養

又曰歐陽地餘字長賓爲少府誠其子曰我死官屬送汝財物慎無受汝九卿儒者子孫以廉潔著可以自成及卒少府官屬送數百萬其子不受天子聞而嘉焉賜錢百萬後漢書曰東平王蒼爲驃騎正月朔朝蒼當入賀故事少府給璧時陰就爲少府卿貴傲不奉法漏將盡求璧不得蒼掾朱暉遙見少府主簿持璧乃往給曰試請觀之既得而馳奉之就復以他璧朝

張璠漢紀曰太常种拂與李儒戰而死于劭徵爲少府鴻臚皆不受曰我父盡忠於朝而爲時所妬父以身殉國爲賊臣所害爲臣子不能除賊何面目復覲明主三輔聞之爲之感動

應劭漢官儀曰少府掌山澤陂池之稅名曰禁錢以給私養自別爲藏少者小也故稱少府

魏志曰王觀徙少府大將軍曹爽使材官張達斫屋材及諸私用之物觀聞之皆錄奪以沒官少府統三尚方御府內藏珍玩之寶爽等奢放多有干求憚觀守法乃徙爲太僕又曰楊阜字義山爲少府卿然以天下爲己任吳志曰先生遣少府徐詳至魏魏太祖謂詳曰孤比者若越橫江之津與孫將軍遊姑蘇之臺獵長洲之苑吾志足矣詳對曰大王欲奉至尊以合諸侯若越橫江而遊姑蘇是踵亡秦而蹈夫差恐天下事去矣太祖曰徐生得無逆詐耶

臧榮緒晉書曰陳跡字國鎮過江爲少府卿時大旱經火大興四年四月始雨有司奏應報賽宗廟山川中宗詔曰

六平御覽 卷一百三十六
祈廟云報賽非奉尊上辭也吾意有疑眈以爲舊山川有
祈報故雨應賽非大事不應告廟子無要君親之道謂祭
稱賽於義有違從之

唐書官品志曰少府卿位視尚書左丞置材官將軍左右
中尚方甄官平水中署南塘邸稅庫東西冶中黃細作炭
庫紙官柴署等令丞

將作監

六典曰將作大匠之職掌供邦國修建土木工匠之政摠
四署三監百工之官屬以供其職事少匠貳焉

漢書曰將作少府秦官掌治宮室

范曄後漢書曰魏霸徵拜將作大匠明年和帝崩典作順
陵時盛冬地凍中使督促數罰掾吏以厲霸霸撫循而已
初不切責而反勞之曰今諸卿被辱大匠過也吏皆懷恩

力作功倍

續漢書曰曹裒字叔通遷將作大匠時有疾疫巡行病徒
自省醫藥糜粥死者減少

又百官志曰將作秩二千石掌作宗廟路寢宮室丞一人
六百石左右校令左右工徒掌木工之功并樹桐梓之類
列于道側

又曰李固字子堅遷大匠常推賢士孔融以將作大匠遷
少府也

華嶠後漢書曰應順字仲華爲將作大匠發擿衆姦皆極
其刑豪猾之吏累迹視事五年省費以億萬
應劭漢官儀曰世祖中興以謁者領其官章帝建初元年
乃置真位次河南尹永元七年大匠應慎上言百郡計吏
觀國之光而舍逆旅崎嶇私館貢篚之物朽濕曝露昔昔

霸之盟主耳舍諸侯於隸人鄭子產以為大譏況今四海之大而可無乎和帝嘉納之魏志曰楊阜字義山為將作大匠明帝時初治宮室發美女充後庭阜上疏欲省官人請不見幸者乃召御府吏問後宮人數吏守舊令對曰禁密不得宣露阜怒杖吏一百數之曰國家不與九卿為密反與小吏為密乎帝聞之而愈警憚○晉書曰將作大匠陳總掘地得古尺上書奏今尺長於古尺宜以古為正潘岳以為習用已久不宜復改唐書官品志曰大匠卿位視太僕掌土木之工統左右校諸署

汝南先賢傳曰應仲華遷大匠除藻飾之無用割有損之浮費凡所省七億餘萬

太平御覽卷第二百三十六

太平御覽卷第二百三十七

職官部三十五

摠敘將軍
左右金吾衛將軍

左右衛將軍諸衛將軍附
諸衛上將軍

摠敘將軍

石氏中官占曰河鼓星主軍鼓一曰三星主天子三將軍以中央大星為大將軍左星為左將軍右星為右將軍所備闕梁而距難也

周禮夏官上大司馬曰凡制軍方有二千五百人一鄉之起徒役家王六軍道皆兼三才而兩之故數俱六也大國三軍過半天子之封也成國不次國二軍諸伯小國一軍之軍將皆命卿位視六事之人同於六卿之大夫春秋之佐猶執政者貪其權遂以陵遲皆非周公之舊也

左傳襄二年曰晉蒐于綿上以治兵使士丐將中軍辭曰伯游長昔臣習於知氏是以佐之非能賢也請從伯游使荀偃將中軍士丐佐之使韓起將上軍辭以趙武

孝經左契曰將軍順虎銜珠夫正海出魚

史記曰齊景公召穰苴與語大悅以為將軍將兵扞燕

又曰孝文後六年匈奴入上郡周亞夫為將軍居灞上祝

茲侯徐廣曰表作松軍棘門以備胡

漢書曰楚王召宋義計事而悅之因以為將軍

范曄後漢書曰靈帝時望氣者以為京師當有大兵兩宮

流血大將軍司馬許源說何進曰太公六韜有天子親於

兵事可以威壓四方詔進大發兵講武於平樂觀下起大

壇上建十二重五綵華蓋高十丈壇東北有小壇復九重

華蓋高九丈引步兵騎士數萬人結營為陣天子親出臨

軍住大華蓋下進住小華蓋下禮畢帝躬擐甲上馬稱無上將軍行陣三匝而還

魏志云太祖令曰司馬法將軍死綬魏書曰綬却也有前一尺無卻一寸也

尸子曰十萬之軍無將軍必亂

左右衛將軍諸衛將軍附

六典曰左右衛將軍之職掌統領宮庭警衛之法令以督其屬之隊仗而摠諸曹之職務焉其左右驍衛左右武衛

左右威衛左右領軍衛將軍所掌之職皆如之

晉書曰羊琇為晉臺左衛將軍

又曰吳隱之遷左衛將軍雖居清顯祿賜皆班親族冬月

無被嘗澣衣乃披絮勤苦同於貧庶

何法盛晉中興書曰南頓王宗字延祖拜左衛將軍為肅

祖所昵委以禁旅

又曰王坦之字玄度領左衛少有風格尚刑名之學嘗著廢莊論

又曰虞譚陳略曹毗毛安之並爲左衛將軍

沈約宋書曰左右衛將軍晉文建國所置

隋書曰薛世雄性廉謹凡所行軍破敵之虜秋毫無犯帝由是嘉之帝嘗從容謂群臣曰我欲舉好人未知諸君識否群臣咸曰臣等何能測聖心帝曰我欲舉者薛世雄群臣皆稱善帝復曰世雄廉正節槩有古人之風於是超拜右翊衛將軍煬帝改左右衛爲之

唐書曰元和中以前靈鹽等節度使王伉爲右衛將軍伉在鎮無智略以馭下居常猜忌及多殺人以懼之衆益不附乃召至踰月而授以衛將軍凡將相出入皆翰林草制謂之白麻伉始以責罷中書草制

隋書曰來護兒煬帝卽位遷右驍衛大將軍帝甚親重之大業六年從駕江都賜物千段令上先人塚宴父老州里榮之

魏志曰許褚從太祖戰大破馬超等乃遷武衛中郎將武衛之號自此始也文帝踐阼遷武衛將軍

又曰曹爽自散騎常侍轉武衛將軍爽秉政又以弟訓爲武衛將軍

王敦別傳曰敦子應字安期官至武衛將軍

隋書曰獨孤盛爲左屯衛將軍宇文化及之作亂也裴虔通引兵至成象殿宿衛者皆釋仗而走盛謂虔通曰何物兵形勢太異也虔通曰事勢已然不預將軍事慎無動盛大罵曰老賊是何物語不及被甲與左右十餘人逆拒之爲亂兵所殺

唐書曰咸通中以伶官李可及為威衛將軍曹確執奏曰
 臣覽貞觀故事太宗初定官品令文武官共六百四十三
 員顧謂房玄齡曰朕設此官員以待賢士工商雜色之流
 假令術踰儕類止可厚給財物必不可超授官秩與朝賢
 君子比肩而立同坐而食大和中文宗欲以樂官尉遲璋
 為王府率拾遺寶詢直極諫乃改授光州長史伏乞以兩
 朝故事別授可及之官帝不之聽

又曰高祖以李粲為左監門大將軍禮高年也初高祖問
 粲年幾對曰八十高祖曰公清幹之譽聞於隋曰今年齒
 雖邁筋力未衰但監門之職非公莫可意欲相委如何粲
 以年老辭讓高祖曰籍公處分耳豈欲煩公筋力耶於是
 詔粲自非殿庭皆乘蜀馬論者榮之
 又曰王及善除右千牛衛將軍高祖謂曰朕以卿忠敬故

與卿三品要職他人非搜辟不得至朕所卿佩大橫刀在
 朕側知此官貴否

又曰李聽元和中為羽林將軍有名馬穆宗在東宮令近
 侍諷聽獻之聽以職摠親軍不敢從及即位之始幽冀不
 廷大原與二鎮接境方議易帥宰臣進擬上皆不允謂宰
 臣曰李聽為羽林將軍不與朕馬是必可任

五代史云周廣順二年十二月詔改左右威衛復為左右
 屯衛避太祖諱也

左右金吾衛將軍

六典曰左右金吾衛大將軍之職掌宮中及京城晝夜巡
 警之法以執禦非違

百官表云秦有中尉掌徼循京師如淳曰所謂遊徼徼循
 禁備盜賊也顏師古曰
 徼謂遮繞之也音工鈞反漢武帝太初元年更名執金吾應劭曰吾者
 禦也常執金

革以禦非常也顏師古曰金吾鳥名也主辟不祥天子緹出職主先導以備非常故執此鳥之象因以名官也騎二百人輿服導從車騎滿路群僚之中斯最壯矣舊掌京師盜賊考按疑事漢郅都甯成王温舒臧宣等皆截理橫噬虎而冠者也止切理辦亦旋誅黜又置執金吾丞後漢掌宫外戒司非常水火之事衛尉巡行宮中金吾微循宮外為表裏以擒姦討猾日三繞行宫外及主兵器自中興但專徵循不與他政又有執金吾吏文學執金吾佐執金吾員吏魏武秉政復為中尉晉初罷直至後周置武環率武侯率下大夫各二人隋置左右武侯府大將軍一人將軍三人掌車駕出入先驅後殿晝夜巡察執捕姦非烽候道路水草所宜巡狩田師則掌其營禁煬帝大業三年改為左右武侯衛所領軍士名伏飛漢官表曰漢有左弋令武帝太初元年更名唐伏飛掌弋射屬少府光武省之隋氏採舊名唐初又為左右武侯府貞觀十年十二月馬周奏京城諸街置鼓罷傳呼龍朔二年

改為左右金吾衛置大將軍一人所掌與隋同將軍二人副其事領官屬並隋置大唐因之後漢書曰初光武適新野聞陰后美心悅之後至長安見執金吾車騎甚盛因歎曰仕宦當作執金吾娶妻當得陰麗華

漢官宰尹下曰吾禦也常執金革以禦非常緹騎二百人五百二十人輿馬導從充滿於路世祖微時歎曰仕宦當作執金吾是也漢書百官公卿表曰秦名曰中尉掌徼循京師有兩丞候司馬兵千人武帝太初元年更名執金吾又曰母將隆為執金吾時侍中董賢方貴上使中黃門發武庫兵前後十輩送賢及上乳母王阿金隆奏武庫兵器天下公用國家武備繕治造作皆度大司農錢蘇林曰用度皆出大

司大司農錢自非乘輿不以給供養勞賜一出少府蓋不以本藏給末用不以民力供浮費別公私示正路也

又曰鄧都為中尉丞相條侯至貴倨也而都揖丞相是時民樸畏罪自重而都獨先嚴酷行法不避貴戚列侯宗室見都側目而視號曰蒼鷹也

東觀漢記曰馬防字孝孫拜執金吾性矜嚴公正上事處議多見用

續漢書曰陰識拜執金吾位特進入則極言正諫至與賓客語不及國事常慕仲山甫匪躬之節所用掾史皆得天下俊哲虞詡傳賢等是也

又曰朱浮字叔元為執金吾帝以二千石長吏不堪任時有纖微之過者必見斥罷交易紛擾百姓不寧六年有日蝕之異浮因上疏切諫自是州郡奏長吏二千石不任位

者事皆先下三公遣掾史案然後黜退

又曰秩中二千石掌宫外戒司非常水火之事月三繞行官外及主兵器丞一人比千石

華嶠後漢書曰賈復為執金吾更始鄼王尹尊及諸將反上召諸將議以檄叩地曰鄼最強宛次之復率爾對曰臣請擊鄼上笑曰執金吾擊鄼吾復何憂邪

又曰耿秉為人威重有謀略拜執金吾每行幸秉恒領宿衛

謝承後漢書曰梁冀執金吾歲朝託疾不朝司隸左雄治之詔以二月俸贖罪

漢雜事曰辛慶忌明略威重任國柱石為執金吾

魏書曰臧霸與曹休討吳破賊呂範於洞浦徵為執金吾每有軍事帝咨訪焉

又曰崔琰遷中尉琰聲姿高暢眉目疎朗鬚長四尺七寸有威重朝士瞻望太祖亦嚴憚焉

又曰徐奕太祖以為中尉手令曰昔楚有子玉文公為之側席汲黯在朝淮南為之折謀詩稱邦之司直君之謂也

唐書曰高祖以徐世勣為右武侯大將軍隋大業三年及唐初並為左右復為左右金吾 詔曰念功褒善哲王彝訓紀德親賢有

國通典黎州摠管曹國公世勣本自黎陽擁徒歸順任以藩岳誠効克彰節義不渝夷險無變信同金石操擬松筠

宜加寵命用超恒序可賜姓李氏

又曰趙道典貞觀初歷遷左武侯中郎將明閑宿衛號為稱職太宗嘗謂之曰卿父為隋武侯將軍甚有當官之譽

卿今克傳弓冶可謂不墜家聲因授右武侯將軍其父時麻宇仍舊不改時人以為榮

又曰裴諝為右金吾將軍建中初上以刑名理天下百吏震悚時十月禁屠殺以甫近山陵禁益嚴尚父汾陽王郭

子儀隸人殺羊以入門者覺之諝列奏狀上以為不畏強禦累遣宣喻或謂諝曰郭公有社稷功豈不為蓋之諝笑

曰非爾所解且郭公威權太盛上新即位必謂黨附者眾今發其細過以明不弄權耳吾上以盡事君之道下以安

大臣不亦可乎

又曰臧希讓為金吾大將軍骯髒好談時政屢以理體上千公卿詔令集賢院待制希讓無學術及處近地從容公

卿聞強引文言以自賢而所聞知多道途得之發必差謬頗為士子所笑

諸衛上將軍

唐通典曰魏黃初中始有上大將軍以曹真為之吳亦以

諸衛上將軍

陸遜為上大將軍後周建德四年增置上大將軍隋並以
為武散官不理事上大將軍從二品

又曰唐武德初秦王既平王世充及竇建德高祖以秦王
功殊古今自昔位號不足以為稱乃特置天策上將軍以
拜焉位在王公上

又曰貞元二年九月詔曰六軍先已各置統軍一人今十
六衛宜各置上將軍一人秩從其品繇是上將軍之官始
列於品位

太平御覽卷第二百三十七

太平御覽卷第二百三十八

職官部三十六

大將軍寮屬

驍騎將軍

後將軍

大將軍

車騎將軍

衛將軍

左將軍

驃騎將軍

前將軍

右將軍

史記曰武帝伐匈奴以衛青為大將軍位在諸公上公卿
皆拜唯汲黯獨揖有言大將軍尊貴不宜爾黯曰大將軍
有揖客獨不貴耶青聞之愈重黯

漢書曰武帝以霍光為大將軍輔昭帝田千秋為丞相及
昭帝初即位未任聽政事一決大將軍光千秋居相位謹
厚有重名光謂千秋曰始與君侯俱受先帝遺詔令光治
內君侯治外宜有以教督使光無負天下千秋曰唯將軍

留意卽天下幸甚終不有所言

後漢書曰竇憲爲大將軍威震天下復出屯武威會帝西祠園陵詔憲與車駕會長安及憲至尚書以下議欲拜之伏稱萬歲韓稜正色曰夫上交不諂下交不贖禮無爲人臣稱萬歲之制議者皆慙而止

又曰詔鄧騭班師朝廷以太后故遣五官中郎將迎拜騭爲大將軍到河南使大鴻臚親迎中常侍齋牛酒郊勞王主以下候望於道既至大會群臣賜束帛焉

應劭漢官儀曰和帝以竇憲爲大將軍乃冠三公

又曰梁冀爲大將軍以三世姻媾援立之功公卿希旨上比周霍舉高第茂才官屬皆倍餘府

魏志曰文帝以孫權爲大將軍吳王加九錫

又曰太傅司馬宣王奏免曹爽皇太后詔召高文惠假節

行大將軍事據爽營太傅謂之曰君爲周勃矣

後魏書曰莫題有謀策爲大將軍平慕容麟賜爵東宛侯後太祖欲廣宮宇規度平城四方數十里將摸鄴洛長安之制運材數百萬以題機巧令監定焉

陳思王輔臣論曰知慮深奧淵然難測恭以奉上愛以接下納言左右爲帝喉舌曹大將軍也

大將軍寮屬

魏志曰王謙爲大將軍何進長史進以謙名公之胄欲與爲婚見其二子使擇焉弗許以疾免

臧榮緒晉書曰魯芝字世英耽思墳籍研精稽古自三代之奧典聖人之微言皆該覽焉大將軍曹爽輔政高選賢明以爲官屬延芝爲司馬

續漢書曰李固字子堅拜議郎爲洛陽令大將軍梁冀請

爲從事中郎

晉書曰鄭冲字文和以儒雅爲業簞食瓢飲布衾縕袍不以爲憂大將軍曹爽以爲從事中郎

又曰李喜景帝輔政命喜爲大將軍從事中郎喜到引見謂喜曰昔先公辟君而不應今孤命君而至何也對曰先公以禮見待喜得以禮進退明公以法見繩喜畏法而至帝甚重之○何法盛晉中興書曰郭舒大將軍王敦以爲從事中郎會敦討劉惔切諫敦大怒曰人中間言卿癡故炙卿眉頭今疾復發耶勿復語也舒曰明公聽舒一言舒聞古之狂也直周昌汲黯朱雲皆不癡也昔堯立誹謗之木舜懸敢諫之鼓公爲勝堯舜耶而乃折舒使不得言敦默然也

竹林七賢傳曰阮籍字嗣宗爲太傅司馬宣王參軍遷景

王大將軍從事中郎

通典曰從事中郎漢末官也陳陽爲大將軍王鳳從事中郎是也在主簿上所掌與長史同

華嶠後漢書曰崔駰字亭伯辟大將軍竇憲府掾憲新輔政貴重掾三十人皆故刺史二千石唯駰以處士年少擢在其間憲擅權驕恣駰數諫之出爲長岑長不得意不之官而歸

華嶠後漢書曰馬融字季長爲大將軍鄧騭舍人

晉陽秋曰義興周延爲左率轉尚書遷大將軍諮議參軍

車騎將軍

漢書曰元光元年以中尉程不識爲車騎將軍屯鴈門應劭漢官儀曰帝以元舅馬防爲車騎將軍銀印青綬吳志曰孫壹奔魏以壹爲車騎將軍儀同三司封吳侯以

故王芳貴人邢氏妻之邢美色妬忌下不堪命遂共殺壹及邢氏

蜀志曰鄧芝字伯苗義陽新野人益州從事張裕善相芝往從之謂芝曰君年過七十位至大將軍封侯爲車騎將軍賞罰明善郵卒伍身之衣食資仰於官不苟素儉然終不治私產妻子不免飢寒死之日家無餘財

後魏書曰王衍字文舒出爲散騎常侍征東將軍西兗州刺史衍屆治未幾屬爾朱仲遠稱兵內向州旣路衝爲其攻逼衍不能守爲仲遠所擒以其名望不害也令騎牛從車久乃見釋還洛除車騎將軍

隋書曰長孫覽周武帝在藩與覽親善及卽位彌加禮焉超拜車騎大將軍每公卿上奏必令省讀覽有口辯聲氣雄壯凡所宣傳百寮屬目帝每嘉歎之覽初名善帝謂之

日朕以万機委卿先覽遂賜名焉

驃騎將軍

漢書曰武帝以霍去病爲嫖姚校尉征匈奴累有功寵冠群臣置驃騎將軍秩與大將軍同

後漢書曰明帝卽位以東平王蒼爲驃騎輔政開東閣延英雄及蒼歸國有驃騎時吏丁牧周相以蒼敬賢下士不忍去之遂爲王家大夫數十年事祖及孫帝聞褒美

又曰驃騎將軍漢官也長史司馬各一人金璋紫綬五時朝服武冠佩山玄玉光武中典諸將皆稱大後天下旣定武官悉省

東觀漢記明帝詔曰東平王蒼寬博有謀可以託六尺之孤臨大節而不可奪其名以蒼爲驃騎將軍

又曰張意拜驃騎將軍討東甌備水戰之具一戰大破所

向無前

又曰其將軍不常置比公者又有驃騎將軍建武二十年復置驃騎將軍位次公有長史一人後漢書曰劉隆爲驃騎將軍行大司馬事隆奉法自守視事八歲上將軍印綬罷賜養牛上樽酒十斛應劭漢官儀曰漢興置驃騎將軍位次丞相隋書曰崔彭轉驃騎恒典宿衛性謹密在省闈二十餘年每當上在仗危坐終日未嘗有怠惰之容上甚嘉之上每謂彭曰卿當上日我寢處自安又嘗曰卿弓馬固以絕人頗知學不彭曰臣少愛周禮尚書每於休沐之暇不敢廢也上曰試爲我言之彭因說君臣戒慎之義上稱善韋昭辯釋名曰驃騎將軍車騎將軍秩比三公辯云此二將軍秩本二千石

世說曰何驃騎弟第五以高情遜避而驃騎令仕對曰然第五之稱何必減之驃騎

陳思王輔臣論曰魁傑雄特秉心平直威嚴足憚風行草靡戎昭果毅折衝厭難者司馬驃騎

梁簡文帝讓驃騎揚州刺史表曰常願侯服就列希同特進之班角巾還第不競龍驤之貴而天澤無涯名器摠集竊以驃騎之官旣爲上將神州之重實號土中故以彈壓六戎冠冕九牧豈止司隸絳節金吾緹騎況復任摠皇畿位重連率何則驃騎之號歷選爲重元狩之中始自去病永平之建特授劉蒼齊獻爲公主所由吳漢因群臣之舉

驃騎將軍

漢書曰李廣爲驃騎將軍後出鴈門擊匈奴匈奴生得廣廣時傷陽死睨傍胡兒善馬漸騰而上南馳得脫廣亡失

多當斬贖爲庶人

東觀漢記曰光武以劉相爲驍騎將軍攻中山

又曰建武九年以劉喜爲驍騎將軍攻涿郡

華嶠後漢書曰馬成字君遷拜驍騎將軍北屯常山積數
年上以其勤勞徵歸京師邊民多上書請之上復以成鎮
撫之

魏志曰任城威王彰字子文性勇而鬚黃爲驍騎將軍北
出塞爲寇所要彰獨與麾下數百騎突虜王聞之曰我黃
鬚兒定可用也

又曰董卓立獻帝表太祖爲驍騎將軍與計事太祖乃變
姓名閒行東歸

齊書曰江勳爲侍中轉都官尚書領驍騎將軍王晏啓武
帝曰江勳今重登禮閣兼掌六軍慈渥所覃實有優忝但

語其事任殆同閑輩天旨旣欲升其名位愚謂以待中領
驍騎望實清顯有殊納言上曰勳常啓吾爲其鼻中惡今
旣以何胤王瑩還門下故有此迴換耳

衛將軍

漢書曰文帝至渭橋群臣奉天子法駕迎代邸皇帝即日
夕入未央宮夜拜宋昌爲衛將軍領南北軍

又曰文帝三年遣灌嬰擊匈奴發中尉材官兵屬衛將軍
軍長安

晉書曰虞潛字思奧爲衛將軍貌如不武內實堅明

前將軍

漢書曰前後左右將軍皆周末官秦因之位亞上卿金印
紫綬

又曰武帝征西夷有前後左右將軍宣元以後雜錯更置

或爲前或爲後或爲左或爲右雖不出征猶有其官在諸卿上爲國爪牙所以揚示威靈於四遠折衝萬人如虎如羆

又曰左右前後將軍皆周官也秦漢因置以征四夷後雖不征伐其官常存

又曰傅喜爲右將軍傳太后與政喜數諫太后不悅上即綬病在家上疏固請乃拜前將軍

又曰張遼字文遠鴈門馬邑人也聶壹之後以避怨變姓少爲郡吏武力過人文帝即位轉前將軍又黃初二年遼至洛陽宮文帝引遼會建始殿親問破吳意狀帝歎息顧左右曰此亦古之邵虎也

蜀志曰先主爲漢中王遣費詩拜關羽爲前將軍羽聞黃忠爲後將軍怒曰大丈夫終不與老兵同列不肯拜受詩

羽曰夫立王業者所用非一昔蕭曹與高祖少小親舊而陳韓亡命後至論其班列韓最居上未聞蕭曹以爲怨也今漢中王以一時之功隆崇於漢叔然意之輕重寧當與君侯齊乎王與君譬猶一體同休等戚禍福共之愚謂君侯不宜計官號之高下爵位之多少也僕一介之使銜命之臣君侯不受拜如是便還但相爲惜此舉動恐有後悔耳羽大感悟卽受拜

漢叔黃忠字也

後魏書曰谷楷昌黎人濮陽公渾會孫也稱有幹局遷前軍將軍楷眇一目而性甚嚴忍時人號爲瞎虎

後將軍

漢書曰趙充國爲後將軍西羌反上使御史大夫郗吉問誰可將者充國時年已七十餘對曰無踰於老臣者矣遣問焉曰將軍度羌虜何如當用幾人充國曰百聞不如一

見兵難踰度踰遠也臣願馳至金城圖上方略然羌戎小夷逆天背叛滅亡不久願陛下以屬老臣勿以為憂東觀漢記曰邳彤字偉君信都人也為曲陽卒正更始即位上以大司馬平河北至曲陽彤舉城降為後大將軍魏志曰曹洪為文帝所廢明帝即位拜後將軍

蜀志曰黃忠字漢叔先主為漢中王欲用忠為後將軍諸葛亮說先主曰忠之名望素非關馬之倫而今便令同列馬張在近親見其功尚可喻指關羽遙聞之恐必不悅得無不可乎先主曰吾當解之遂與羽等同位賜爵關內侯晉中興書曰應詹字思遠太興三年為後軍將軍晉起居注曰太始八年置後軍將軍掌宿衛

左將軍

漢書曰公孫賀封南鄉侯帝音芳孝反以左將軍出定襄無功

失侯

又曰辛慶忌字子真為左將軍為國虎臣匈奴西域親附敬其威信

東觀漢記曰賈復字君文治尚書事舞陰李生李生奇之謂門人曰賈生容貌志意如是而勤於學此將相之器徵諸洛陽拜左將軍南擊赤眉新城轉西入關擊盆子於澠池破之

魏志曰文帝即位以張郃為左將軍詔郃與曹真討安定盧水胡及東羌

晉書百官名臣曰王濟字武子起家中書郎遷左軍將軍山濤啓事曰左將軍裴楷通理有才義

右將軍

漢書曰常惠以明習外國事勤勞數有功為右將軍

又曰何武薦辛慶忌宜在爪牙乃拜爲右將軍

魏志曰徐晃字公明爲右將軍性儉約畏慎爲將常遠斥候歎曰古人患不遭明君今我遇之當以功自効

蜀志曰諸葛亮上疏曰臣以弱才叨竊非據親秉旄鉞以厲三軍不能訓章明法臨事而懼至有街亭違命之闕令箕谷不戒之失咎皆在臣授任無方臣明不知人恤事多闇春秋責帥臣職是當請自貶三等以督厥咎於是以亮爲右將軍行丞相事所摠統如前

何法盛晉中興書曰郭默爲右軍將軍默旣遠人樂爲邊將不願內轉謂劉楨曰我能衛胡而不用更用虛名者且右軍主禁兵禁兵不妄出有急方更配給兵將無素是謂棄之安得不亂

又曰王羲之字逸少導之從子也幼訥於言人未之知年

十三嘗見周顛顛異之時重牛心炙座客未啖先割啖之羲之於是聞名及長尤善草隸書爲今古冠絕累遷爲右將軍不樂京師遂往會稽與謝安孫綽等遊處山陰有道士養群鵝羲之意甚悅道士云爲寫黃庭經當舉羣相贈乃爲寫訖籠鵝而去

太平御覽卷二百三十八

太平御覽卷一百三十九

太平御覽卷一百三十九
職官部三十七
又曰
征東將軍
征西將軍
征南將軍
征北將軍
四鎮將軍
鎮東將軍
鎮西將軍
鎮南將軍
鎮北將軍
四安將軍
安東將軍
安西將軍
安南將軍
安北將軍
四平將軍
平東將軍
平西將軍
平南將軍

太平御覽卷一百三十九

職官部三十七

又曰

征東將軍

征西將軍

征南將軍

征北將軍

四鎮將軍

鎮東將軍

鎮西將軍

鎮南將軍

鎮北將軍

四安將軍

安東將軍

安西將軍

安南將軍

安北將軍

四平將軍

平東將軍

平西將軍

平南將軍

平北將軍

雜號將軍上

鎮軍將軍

撫軍將軍

征虜將軍

冠軍將軍

輔國將軍

領軍將軍

護軍將軍

中軍將軍

游擊將軍

積射將軍

積弩將軍

強弩將軍

殿中將軍

員外將軍

直閣將軍

征東將軍

魏志曰張遼字文遠為征東將軍征孫權被甲持戟先登陷陣衝壘入至權麾下

又曰滿寵字伯寧為征東將軍詔曰君典兵在外專心憂公賜田十頃穀五百斛錢二十萬以明清忠儉約之節

晉書王渾平吳轉征東大將軍復鎮壽陽渾不尚刑名處

斷明允時吳人新附頗懷畏懼渾撫循羈旅虛懷綏納座無空席門不停賓於是江東之士莫不悅附

征西將軍

東觀漢記曰馮異為征西將軍入關征赤眉

又曰耿秉為征西將軍領撫單于及薨南單于舉國發喪犁面流血

魏志曰夏侯淵字妙才為征西將軍守漢中

後魏書曰陸真代人也少善騎射數從征伐所在摧鋒陷陣前後以功為征西將軍

征南將軍

魏志曰夏侯尚字仁伯淵從子也文帝與之親友太祖定冀州尚為軍司馬常從征討遷征南將軍

又曰曹仁為征南將軍臨陵侯彰北征烏丸文帝在東宮

為書戒彰曰為將奉法不當如征南耶
晉書曰羊祜為征南將軍寢疾求入朝既至洛陽會景獻
梓宮在殯哀慟至篤中詔申論扶疾引見命乘輦入殿無
下拜甚見優禮

後魏書曰司馬景之字洪略晉汝南王亮之後太宗時歸
封蒼梧公加征南大將軍

魏志曰杜恕為幽州刺史時征北將軍程嘉屯薊尚書表

偏等戒恕曰程申伯今俱杖節共屯一城宜深有以禮之
沉約宋書曰衡陽王義季為征北將軍徐州刺史

鎮東將軍

魏志曰臧霸字宣高太山華陰人也亡命東海以壯勇聞
太祖募索得霸見而悅之以為琅琊相文帝即位遷鎮東

將軍

鎮西將軍

魏志曰曹真字子丹文帝即位以真為鎮西將軍

蜀志曰馬超父騰靈帝末與邊章韓遂等俱起事於西州
初平三年遂騰率眾詣長安漢朝以遂為鎮西將軍遣還
金城騰為征西將軍屯郿

鎮南將軍

蜀志曰黃權字公衡伐吳敗於白帝既附魏文帝曰君捨
逆歸順欲追蹤陳韓耶權曰臣降吳不可歸蜀無路是以
歸命敗軍之將免死焉幸何古人之可慕帝善之拜鎮南
將軍

吳志曰呂岱既定交州進討九真斬獲萬數又遣從事南
宜國化及徼外扶南林邑堂明諸王各遣使奉貢權嘉其

功進拜鎮南將軍

晉書曰杜預爲鎮南將軍繕兵甲曜威武乃簡精銳襲吳西陵督張政大破之以功增封三百六十五戶政吳之名將也據要害之地耻以無備取敗不以所喪之實告于孫皓預欲閒吳邊將乃表還所獲之衆於皓皓果召政遣武昌監劉憲代之故大軍臨至使其將帥移易以成傾蕩之勢預處分既定乃啓請伐吳之期

後魏書曰唐和詣闕世祖優之待以上客高宗以和歸誠先朝拜鎮南將軍

鎮北將軍

魏氏春秋曰許元字士宗爲鎮北將軍都督河北諸軍事蜀志魏延字文長先主大會群臣問延曰今委卿以重任卿居之欲云何延對曰若曹操舉天下而來請爲大王距

之偏將十萬之衆至請爲大王吞之先主稱善衆咸壯其言先主踐尊號進拜鎮北將軍

晉書曰何曾爲鎮北將軍文帝使武帝齊王攸送之帝又過其子曾先勅劭曰客必過汝汝當預嚴劭不冠帶停帝良久曾深以爲譴劭曾見崇重如此

安東將軍

王隱晉書曰武帝伐吳以王渾爲安東將軍晉公卿禮秩曰世祖以扶風王駿爲安東大將軍

安西將軍

魏志曰曹仁字子孝太祖從弟也少好弓馬弋獵俊豪並起仁亦陰結少年周遊淮泗之間遂從太祖爲別部司馬太祖討馬超以仁行安西將軍

安南將軍

謝承後漢書曰光武以岑彭爲安南將軍

安北將軍

沈約宋書曰劉秀之東莞莒人少孤貧有志操爲安北將軍
薊州刺史上車馬幸新亭視秀之發引

平東將軍

王隱晉書曰武帝伐吳以王濬爲平東將軍

平西將軍

蜀志曰馬超聞先主圍劉璋於成都密書請降先主遣人
迎超超將兵徑到城下城中震怖璋即稽首以超爲平西
將軍

沈約宋書曰臨川王義慶爲平西將軍

平南將軍

王隱晉書曰武帝伐吳以胡奮爲平南將軍

平北將軍

魏志曰太祖征冀州張燕求佐軍拜平北將軍

雜號將軍上

鎮軍將軍

魏志曰黃初七年魏文以陳群爲鎮軍大將軍錄尚書事
受顧命

又曰甘露元年以石苞爲鎮軍將軍

沈約宋書曰齊王攸爲鎮軍驃騎上將軍後復舊

撫軍將軍

魏志曰黃初四年以司馬宣王爲撫軍大將軍輔政

又曰齊王嘉平三年以司馬景王爲撫軍大將軍輔政

語林曰簡文爲撫軍時坐牀上生塵不聽左右拂去見鼠
行跡視以爲嘉有參軍見鼠以手板格煞之撫軍謂曰無

乃不可乎

征虜將軍

東觀漢記曰祭遵為征虜將軍廉潔奉公光武歎曰安得憂國奉公如祭征虜者乎

魏志曰太祖以臨淄侯植為征虜將軍遣救曹仁呼有所勅而植醉於是罷之

又曰南陽周太好立功善用兵以為征虜將軍

沈約宋書曰征虜將軍世號金紫將軍

冠軍將軍

史記曰楚義帝以宋義為卿子冠軍

漢書曰武帝以霍去病征匈奴功冠三軍封冠軍侯

魏志曰正始中以文欽為冠軍將軍揚州刺史

晉起居注曰武帝泰始七年詔曰議郎胡奮開爽忠亮有

文武才幹歷位外內涉練戎事威略之聲著于方外其以奮為冠軍將軍

齊書曰劉峻嘗從駕登蔣山上數歎曰貧賤之交不可忘糟糠之妻不下堂顧謂峻曰此況卿也世言富貴好改其素情吾雖有四海今日與卿盡布衣之適峻起拜謝遷冠軍將軍

晉書載記曰符堅寇晉以姚萇為龍驤將軍督益梁州諸軍事謂萇曰朕本以龍驤建業龍驤之號未曾假人今特以相授山南之事一以委卿堅左將軍竇衝進曰王者無戲言此將不祥之徵也惟陛下察之堅默然○車頻秦書曰符堅與符健西入關堅時年十二未有軍號健夢有天神遣使者朱衣武冠拜堅為龍驤將軍後加此官以應神夢羊祜別傳曰先時吳童謠云阿童復阿童銜刀浮渡江不

畏岸上虎但畏水中龍祐聞之曰此必水軍有功即表王濬為龍驤將軍謀伐吳
晉書王導為輔國將軍導上牋曰昔魏武達政之主也荀文若功臣之最也封不過亭侯倉舒愛子之寵也贈不過別部司馬以此格萬物得不局跡乎今者臨郡不問賢愚豪賤皆加重號輒有鼓蓋時有不得者或為恥辱天官混雜朝望頽毀導忝荷重任不能崇浚山海而開創亂源饜竊名位取紊彝典謹送鼓蓋加崇之物請從導始庶令雅俗區別羣望無惑
王隱晉書曰王濬為輔國將軍
又曰羊琇以輔國將軍開府儀同
領軍將軍

魏志曰文帝即位拜曹休為領軍將軍
晉書曰紀瞻轉領軍將軍當時服其嚴毅雖恒疾病六軍敬憚之瞻以久病請去官不聽復加散騎常侍及王敦之逆帝使謂瞻曰卿雖病但為朕卧護六軍所益多矣
晉陽秋曰韓康伯年四十九拜領軍疾病占候者云不宜此官固請徙之
何法盛晉中興書曰陶回拜領軍將軍加散騎常侍性方範不畏強禦丹陽尹桓景頗以佞事司徒王導導甚昵之回常慷慨謂景非正人不宜親狎會熒惑守南斗經旬王公語回曰南斗揚州分而熒惑守之吾當遜位以厭此譴回荅曰公以明德作鎮輔弼聖王當親忠貞遠邪佞與桓景造膝熒惑何由退舍導深愧之
梁書曰胡曾祐拜領軍將軍厚自封植以所加鼓吹恒置

齋中對之自娛人曰此是羽儀公名望隆重不宜若此荅曰我性愛之恒須見耳或出遊亦以自隨人士笑之唐書曰貞元十一年以前太子賓客李愿為左領軍大將軍李憑為右威衛大將軍依前兼中丞皆太尉晟之子以免喪故晟諸子同日授官者凡九人

護軍將軍

王隱晉書曰王敦將復作逆明帝問曰何如應詹厲然慷慨荅詔曰陛下宜奮赫斯之威臣等當負戈從戎以順討逆誠社稷之計也即以詹為護軍將軍同心滅敦

中軍將軍

漢書曰馮奉世字子明元帝以為中軍屯首陽魏志曰曹真持節都督中外諸軍事中軍將軍受顧命王隱晉書曰太始元年以羊祜為中軍將軍揔宿衛

游擊將軍

史記曰漢高祖以陳豨為游擊將軍

漢書曰太初元年以蘇建韓說為游擊將軍

表宏漢紀曰建武二年以鄧隆為游擊將軍助朱浮攻彭

寵

魏志曰卞蘭少有才學為游擊將軍加散騎常侍

山濤啓事曰游擊將軍諸葛冲精果有文武擬補兗州詔

荅曰冲領兵未欲出之

積射將軍

後周書曰于謹除積射將軍又隨廣陽王元深征鮮于脩禮停軍中山侍中元晏言於靈太后曰廣陽王以宗室之重受律專征今乃盤桓不進坐圖非望又有于謹者智略過人為其謀主風塵之隙恐非陛下純臣矣靈太后詔於

尚書省門外立榜募能獲謹者許重賞謹聞之乃謂廣陽王曰今女主臨朝取信讒佞脫不明白殿下素心便恐禍至謹請束身詣闕歸罪有司披露心腹深遂許之謹遂到榜下曰吾知此人衆共詰之謹曰我卽是也有司以聞靈后引見之大怒謹備述廣陽忠款兼陳停軍之狀靈后意解捨之○世語曰積弩將軍樊震對武帝稱鄧艾之忠

積弩將軍

沉約宋書曰積弩將軍晉官也

齊職儀曰積弩將軍品第四銀章青綬武冠絳朝服佩水蒼玉

晉太康十年立積弩積射營各二千五百人並以將軍領之

强弩將軍

漢書曰元狩元年以李沮爲强弩將軍伐匈奴

又曰太初二年以路博德爲强弩將軍

又曰神雀二年以許延壽爲强弩將軍遷大司馬
傳暢晉讚曰晉文王晉臺置强弩將軍掌宿衛

殿中將軍

玄中記曰漢桓帝時出遊河上忽有一青牛從河中出直走盪桓帝邊人皆走太尉何公爲殿中將軍有勇力輒走逆之牛見公往乃反走還河未至河公及牛乃以手拔牛左足脫以右手持斧斫牛頭殺之此青牛者是萬年木精也

語林曰庾公欲伐王公先書與郗公曰老賤賊轉欲斬張殿中將軍舊用才學士以廣視聽而頃悉內面牆人是欲蔽王之明便欲勒數州之衆以除君側之惡今年之舉篋

不濟矣

貞外將軍

後魏官氏志曰貞外將軍從第八品

直閣將軍

後魏書曰楊曄字延季弘農華陰人也性雅厚頗有文學起家朝奉請稍遷直閣將軍

蕭子顯齊書曰王敬則晉陵南沙人也生而紫胞年長而腋下生乳各長數寸夢騎五色師子明帝即位為直閣將軍

齊書曰劉善明為直閣將軍五年青州沒虜善明母陷北虜移置桑乾善明布衣蔬食哀感如持喪明帝每見為之歎息時人稱之

太平御覽卷第二百三十九

太平御覽卷第二百四十

職官部三十八

雜號將軍下

建威將軍

奮威將軍

奮武將軍

振威將軍

揚威將軍

建武將軍

輕車將軍

伏波將軍

材官將軍

折衝將軍

虎威將軍

偏將軍

裨將軍

虎牙將軍

漢臣將軍

討虜將軍

破虜將軍

建義將軍

刺姦將軍

輔威將軍

揚化將軍

安漢將軍

輔漢將軍

都護將軍

立義將軍

中堅將軍

厲威將軍

盪寇將軍

討逆將軍

輔吳將軍

盪魏將軍

鷹揚將軍

牙門將軍

中將軍

中領軍

中護軍

北軍中候

朱衣直閣

直寢

直後

直齋

監軍

建威將軍

東觀漢記曰光武以耿弇為建威大將軍從攻雒陽

奮威將軍

魏志曰呂布殺董卓王允以布為奮威大將軍儀比三司

又曰蒯援說袁紹紹即表為奮威將軍

奮武將軍

吳志賀齊傳曰豫章東部民彭材李玉王海等起為賊亂
眾萬餘人齊討平之誅其首惡餘皆降服揀其精健為兵
次為縣戶遷奮武將軍

振威將軍

魏志曰太祖以程昱為振威大將軍破表譚尙

揚威將軍

魏志曰臧霸字宣高太山人也從太祖討孫權於濡須口
與張遼為前鋒行遇霖雨大軍先反水遂長賊船稍近將
士皆不安遼欲去霸止之曰公明於利鈍寧肯捐吾等耶
明日果有令遼至以語太祖太祖善之拜霸揚威將軍

建武將軍

魏志曰太祖以夏侯惇為建武將軍

又曰文帝善孟達姿容觀以為建武將軍

輕車將軍

漢書曰武帝元光七年以公孫賀為輕車將軍屯馬邑

伏波將軍

環齊要略曰伏波船涉江海欲浪伏息也

漢書曰武帝元鼎五年以路博德為伏波將軍伐南越呂嘉

東觀漢記曰光武以馬援為伏波將軍

魏志曰夏侯惇為伏波將軍領河南尹使得以便宜從事不拘科制太祖常與同載特見親重出入卧內諸將莫得比也

王隱晉書曰武帝以孫秀為伏波將軍

材官將軍

漢書曰武帝以李息為材官將軍軍馬邑

折衝將軍

魏書曰武帝以樂進為折衝將軍

虎威將軍

魏志曰于禁字文則太山人將軍王服異之薦禁才任大將太祖召見與語拜軍司馬後拜虎威將軍

吳志曰朱然字義封從孫權討關羽別與潘璋到臨沮擒羽遷昭武將軍封西安鄉侯虎威將軍呂蒙病篤權問曰卿如不起誰可代者蒙對曰朱然膽守有餘愚以為可任蒙卒權假然節鎮江陵

齊書曰柳世隆元景子也出為虎威將軍上庸太守帝謂元景曰卿昔以虎威之號為隨郡今復以授世隆使卿門世不絕公也

偏將軍

後漢書曰吳漢字子顏南陽宛人家貧以販馬自業素聞世祖長者獨欲歸心及世祖於廣阿拜漢為偏將軍又曰臧宮字君翁潁川人也從世祖征戰諸將多稱勇世

祖察宮勤力少言甚親納之及至河北以爲偏將軍
吳志曰陳武字子列廬江人孫策在壽春武脩謁時年十
八長七尺七寸及權統事尤爲權所愛拜爲偏將軍
又曰董襲字元代會稽人長八尺武力過人拜偏將軍
裨將軍

魏志曰李通字文達江夏平春人以遊俠聞於江汝之間
屬連歲大飢通傾家振施與士分糟糠建安初通舉衆詣
太祖于許太祖討張繡通爲先登大破繡軍拜裨將軍

虎牙將軍

漢書曰宣帝以雲中太子田順爲虎牙將軍伐匈奴
范曄後漢書曰蓋延字巨卿漁陽人也身長八尺邊俗尚
勇力而延以氣聞延與吳漢同歸世祖從平河北世祖即
位爲虎牙將軍

漢臣將軍

東觀漢記曰上於大會中指王常謂羣臣曰此家率下江
諸將輔翼漢室心如金石真忠臣也是日以常爲漢臣將
軍與諸將絕席

討虜將軍

東觀漢記曰光武以王霸爲討虜將軍擊董憲

破虜將軍

魏志曰李典字曼成山陽鉅野人爲破虜將軍典好學問
貴儒雅不與諸將爭功敬賢士大夫恂恂若不及軍中稱
其長者

建義將軍

東觀漢記曰光武以朱祐爲建義將軍攻朱鮪

刺姦將軍

東觀漢記曰光武以軍市令祭遵為刺姦將軍
范曄後漢書曰岑彭字君然南陽棘陽人也後世祖拜為
刺姦大將軍使督察眾營授以常所持節

輔威將軍

東觀漢記曰光武以臧宮為輔威將軍

揚化將軍

東觀漢記曰光武以堅鐔為揚化將軍

安漢將軍

蜀志曰麋竺字子仲益州既定拜為安漢將軍班在軍師
將軍之右竺雍容敦雅而翰翮非所長是以待之上賓之
禮未曾有所統御然賞賜優寵無與為比
又曰王平字子均諸葛亮卒於武功軍退還魏延作亂一
戰而敗平之功也遷安漢將軍

輔漢將軍

東觀漢記曰光武以鄧奉為輔漢將軍

都護將軍

魏志曰曹洪累從征討為都護將軍

立義將軍

魏志曰龐德以眾降太祖聞其驍勇拜立義將軍

中堅將軍

魏志曰太祖以許褚為中堅將軍又以張遼為行中堅將
軍

厲威將軍

魏志曰太祖征荊州還留滿寵行厲威將軍

盪寇將軍

蜀志曰張嶷字伯岐自越嶲詣成都民夷戀慕泣涕過

施牛邑民襁負來迎及追尋至蜀郡界其督率隨巖朝
貢者百餘人巖至拜盪寇將軍慷慨壯烈士人多貴之

討逆將軍

吳志曰曹公表孫策爲討逆將軍封吳侯

輔吳將軍

吳志曰孫權以張昭爲輔吳將軍

沈約宋書曰吳置輔吳將軍班亞三司

盪魏將軍

吳志曰呂據太元元年大風江水盛溢泛流淹城門權使
視水獨見據使人取大船以備善權嘉之拜盪魏將軍

鷹揚將軍

晉書曰郭奕咸寧初遷雍州刺史鷹揚將軍尋假赤幢曲
蓋鼓吹

牙門將軍

蜀志曰魏延字文長義陽人也以部曲將隨先主入蜀數
有戰功遷牙門將軍

中將軍

北齊書曰沙苑之敗崔仲文持馬尾以渡河波中乍沒乍
出高祖望見之曰崔掾也遽遣舡赴接旣濟勞之曰卿爲
親爲君不顧萬死可謂家之孝子國之忠臣加中將軍

中領軍

魏略曰中領軍延康中置故漢北軍中候之官

又曰太祖以史渙忠勇爲中領軍領禁軍

又曰太祖還長安以曹休爲中領軍

又曰文帝征孫權以尚書令陳群爲中領軍

晉書曰吳隱之爲中領軍清儉不華每月初得祿裁留身

糧其餘悉分賑親族家人績紡以供朝夕時有困絕或併日而食恒布衣不完妻子不霑寸祿

晉中興書曰羊祜字叔子遷中領軍悉統宿衛入直殿中執兵之要事兼內外

齊書曰蕭景先武帝少年與景先共車行塗路車久故壞至領軍府西門車轅折俱狼狽景先謂帝曰兩人脫作領軍亦不得忘今日艱辛及武帝踐阼詔以景先爲領軍拜日羽儀甚盛傾朝觀矚拜還未至府門中詔相聞領軍今日故當無折轅事耶景先奉謝

梁書曰臧盾遷中領軍領軍管天下兵要監局事多盾爲人敏瞻有風力長於撥繁職事甚理天監中吳平侯蕭景居此職著聲稱至是盾復繼之

三國典略曰齊左僕射祖珽附陸令萱求爲領軍齊主許

之侍中斛律孝卿謂上洛王元海侯呂芬等云珽是漢兒兩眼盲豈合作領軍也元海遂入啓之珽言於齊主云元海與臣素有隙必是元海譖臣齊主曰然珽列元海共太府少卿李叔元平准令張叔略等結朋樹黨陸令萱又唱和之遂除元海爲鄭州刺史叔元爲襄城郡守叔略爲南營州錄事參軍珽遂獨處機衡總知兵事齊主亦令中要人扶持出入每同御榻論決朝政

中護軍

高堂隆集曰己巳詔書中領軍游繫皆青玉佩

史記曰漢高帝以陳平爲護軍中尉盡護諸將
漢書曰護軍都尉秦官元狩四年屬大司馬元壽元年更名司寇元始元年更名護軍
魏志曰韓浩字元嗣以忠勇顯爲中護軍掌禁兵置長史

司馬從太祖討張魯魯降議者以浩智略足以綏邊欲留使都督諸軍鎮漢中太祖曰吾安可以無護軍乃與俱還其見親如此

王隱晉書曰鄧攸遷吏部尚書牧馬於家庭妻子素食當時清淨內外肅然遷為中護軍

晉起居注曰武帝太始七年詔曰中護軍職典武選宜得堪幹其事者左衛將軍羊琇有明瞻才見乃心在公其以琇為中護軍

晉中興書曰司徒王導將以趙冰為中護軍孔愉謂導曰中興以來處此官者用周伯仁應思遠今誠乏才豈可以趙冰居之其秉正不撓皆此類也

世語曰夏侯玄世名知人為中護軍拔用武官無非俊傑多牧州典郡

皇甫謐集云護軍武士之官

晉王羲之臨護軍教曰今所任要在於公役均平其差大史忠謹在公者覆行諸營家至人告暢吾乃心其有老落篤癘不堪從役或有飢寒之色不能自存者區分剋別自當參詳其宜

北軍中候

漢書曰武帝置中壘校尉掌北中壘門外內

續漢書曰光武中興省中壘置中候五尉校營

又曰孔文舉拜北軍中候

王隱晉書曰荀晞字道將為北軍中候

又曰太祖永昌元年以鍾雅為北軍中候五年省併領軍晉中興書曰陶回字恭之王導以回有器幹擢拜北軍中候回性不畏強禦

朱衣直閣

後魏書曰元文景大司農卿康之次子除員外郎冠軍將軍朱衣直閣

直寢

後魏書曰于忠字思賢弱冠拜侍御史文明太后臨朝刑政頗峻忠朴直少言終無過誤尋除左中郎將領直寢又曰楊津字羅漢弘農華陰人也本字延祚高祖賜名焉少端謹以器度見稱為直寢

直後

後魏書曰元天穆性和厚美形兒年二十起家員外郎領直後蕭子顯齊書曰臨海亡命田流自號東海王逃竄會稽鄞縣邊海山谷中立屯營官軍不能討明帝遣直後聞人襲

說降之

直齋

後魏書官氏志曰大和九年十月初置直齋

監軍

史記曰穰苴將兵扞燕晉之師苴曰臣素賤君擢之間伍之中加之大夫之上願得君之寵臣國之所尊以監軍景公使莊賈往苴與賈約曰會日中於軍門苴先馳至軍立表下漏賈素驕貴夕時乃至苴遂斬賈以徇三軍軍士皆震慄服之

東觀漢記曰光武使來歙監諸將

范曄後漢書曰宋均字叔庠為監軍時伏波將軍馬援征武陵五溪南臨沅水軍士多病均懼眾軍疾疫矯詔迫降之諸將莫應均乃勒兵圍賊城詐為詔而降之為置長吏

而歸自劾矯詔之罪帝善之
魏志曰司馬文王征壽春使監軍石苞統卒為遊軍
 晉武帝起居注曰豫州刺史胡威忠素質直思謀深奧其
 以威為監軍刺史如故

沈約宋書曰監軍蓋諸將出征大將監領之

太平御覽卷第二百四十四

